

FASNACHTSCLIQUE

## JUNTERESSLI

Junge Garde + Binggis



### Ab uf's Dach- Basel spriesst!

S isch z Baasel in de Stroose tot,  
doch uff de Dächer, deert isch rot;  
Tomate nämmlig waggse deert,  
s Ainzig, wo z Baasel niemerts steert

Gmies wo waggst, macht drumm kai Läärm  
Wäg dämm hänn d Basler das so gäärn  
Urban Gardening isch der Hit  
Und ganz Basel macht do mit

Urban Gardening isch z Baasel nei  
Dachtomate der neishti Schrei  
Uff de Dächer Kaabis pflanze  
Mit Giesskanne ummedanze

Anstatt „hors sol“ z importiere  
dien mir Aigebau brobiere  
Statt Salat uss Mexiko  
Duet äär uss der Malzgass koo

s duet s soziale Lääbe stergge,  
das ka jeede sofort mergge,  
wenn d duesch gemainsam Unkruut jätte  
findsch der Huuswaart au e Nätte

Mit so me ne Garte uff em Dach  
Git s numme no ganz sälte Krach.  
allefalls wenn Nochber s Biebli  
haimlig z Nacht uns klaut e Riebli

d Salatkepf spriesse, dasch e Bracht  
Boone waggse dass es kracht  
Garteroose und so witer  
Zwischeduure au no Krütter

Und dass ich em Müller glaub  
Si Hanf sig Thymian - mit Verlaub  
Krieg ich vo iim, immer zem Erschte  
E Seggli mit Canabis, tarnt als Gerschte

Doch pflanze kasch nur uff em Dach  
Wenn das nit schreeg isch, sondern flach  
Drumm het der Wessels jetzt bestimme  
D Zyyt vom Giibeldach isch umme

Glychberächtigung isch das  
Jeedem uff em Dach si Gras  
Sälbscht uff em stolze Baasler Minschter  
Pflanzt me jetzt Lauch oder au Ginschter

Ooder allefalls au Boone  
ändlig duet sich d Kirche loone  
will wäär deert jeede Daag duet bätte  
dää darf denn ärnte, mues nie jätte

Au fir s Dach vom Spaaledoor  
Schloot uns s Baudep Gurke voor  
Und uff em Bahnhof pflanzt me Mais  
Als Proviant grad fir uff d Rais

Uff em Roothuus spriesst s am Beschte  
Und das erscht no ooni Keschte  
Das isch, mir mache jeedi Wett  
will s unde dra vyyl Komposcht het

und d BVB will au mitmache  
mir finde s zwor e bitz zem Lache  
an jeedre Haltstell, s siig kai Sach  
e glaine Pflanzblätz uff em Dach

und wäärend däm uff s Dramm duesch warte  
schaffsch aifach e bitz im Garte  
und wenn de wiiter faarsch im Drämmli  
gilt di Salat als Billje – nämmlig

so isch das Urban Gardening  
e schlicht und aifach super Ding  
alli Birger vo der Stadt  
finde das ganz aifach glatt

Im Baudep iiberleggt me jetz  
Dooderzue e bassend Gsetz  
Woorschiints bruuchsch scho gli, dasch glatt  
E Urban Gardening Bewilligung vo der Stadt

Zem Gligg hänn mir Junteressli vo de Junge  
Uns scho sit langem ussbedunge  
Im ene Käller z iebe und nit imene Turm  
So hänn mir au kai Garte und kai Wurm

Kai Ärger mit Gmies, Blueme und jätte  
Wär duet wär bim Giesse verdrätte  
Ooni Urban Gardening, duesch schnäll begriffe

---

Kasch die konzentriere, uff s Drummle und Pfyffe!

Mechtsch aaf Pfyffe oder Drummle, bisch mindischdens  
7 Jahr alt und hesch Luscht zem sälber Fasnacht mache?  
So mäld dy lieber hit als morn bi unserer Obfrau vo dr

---

Junge Garde, dr Fränzi Moning, fraenzi.moning@bluewin.ch

D Ladäärne-Uusstellig uff em Minschterplatz und d Waage- und  
Reggwisyte-Uusstellig bi dr Kasäärne sin vom Määntig znacht bis  
am Mittwoch demoorge! Deert und an de 3 Verkaufsständ (CINS) in  
dr Stadt ka men au alli Zeedel und Schnitzelbängg, d Blaggedde  
und dr Rädabäng kaufe.

Am Fritig und Samschtig, 26. und 27. Februar isch  
Noochwuggswärbig vo dr 1. Lektion im Zält uff em Barfi.

---

D'Zeedelläasete isch am Sunntig noh dr Fasnacht 2015 am

1. Merze im Käller vo dr Baseldytschi Bihni im alte

Lohnhof, 17 – 19 h. Dr Ytritt isch frey, ,s Drimmelikässli  
hänggt aber am Usgang fir freywilligi Spände an dr Wand.

Druggerey Runser Druck & Satz AG, Basel